

03 SEP 2002

UTUSAN KHAS PRESIDEN FILIPINA TEMUI DR MAHATHIR

PUTRAJAYA, 3 Sept (Bernama) -- Utusan Khas Presiden Filipina, Norberto Gonzales hari ini menemui Perdana Menteri Datuk Seri Dr Mahathir Mohamad di pejabatnya di sini.

Seorang pembantu kepada Perdana Menteri mengesahkan pertemuan itu berlangsung tengah hari ini selama setengah jam.

Difahamkan ia bertujuan antara lain membincangkan laporan media Filipina kononnya pendatang asing tanpa izin dari negara itu yang ditahan di pusat-pusat tahanan menerima layanan buruk.

Gonzales merupakan Penasihat Tugas-tugas Khas Presiden.

Sebelum ini Presiden Gloria Macapagal Arroyo dilaporkan akan menghantar bekas presiden Filipina, Fidel Ramos, untuk menemui Perdana Menteri bagi membincangkan isu tersebut.

Semalam seorang penasihat Arroyo bagi hal ehwal penduduk Islam negara itu, Nur Jaafar bersama rombongan sembilan anggota tiba di Kota Kinabalu, Sabah dan dilaporkan berkata kehadiran mereka bertujuan menghapuskan "beberapa perkara yang boleh menimbulkan bibit sengketa" daripada proses penghantaran pulang pendatang tanpa izin Filipina.

Pihak berkuasa Malaysia telah menangguhkan sementara penghantaran pulang pendatang tanpa izin dari Filipina dan membenarkan pegawai-pegawai Filipina meninjau sendiri layanan yang diberikan kepada pendatang berkenaan.

-- BERNAMA

AZH ZS NMO